

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10), na prijedlog Ministarstva unutrašnjih poslova, Vlada Zeničko-dobojskog kantona, na 133. sjednici, održanoj dana 09.12.2021. godine, d o n o s i

ZAKLJUČAK

I.

Prihvata se Mišljenje Ministarstva unutrašnjih poslova Zeničko-dobojskog kantona dato po prijedlogu Programa rada Skupštine Zeničko-dobojskog kantona za 2022. godinu, poslanika u Skupštini Zeničko-dobojskog kantona Jasmina Duvnjaka, a vezano za izmjene i dopune Zakona o javnom redu i miru-Prečišćen tekst.

II.

Zaključak sa Mišljenjem iz tačke I. dostavlja se Kolegiju Skupštine Zeničko-dobojskog kantona.

III.

Zaključak stupa na snagu danom donošenja.

Broj: 02-_____/21
Datum, 09.12.2021. godine
Zenica

PREMIJER

Mirnes Bašić

DOSTAVLJENO:

1x Ministarstvo unutrašnjih poslova,
1x Stručna služba Skupštine,
1x a/a.



Broj: 08-02-06/1-28-1-2676-2/21 BL

Datum: 01.12.2021. godine.

Stručna služba Skupštine Zeničko-dobojskog kantona uputila je ovom Ministarstvu Prijedlog za program rada Skupštine Zeničko-dobojskog kantona za 2022. godinu, za izmjene i dopune Zakona o javnom redu i miru-Prečišćen tekst ("Službene novine Zeničko-dobojskog kantona", broj: 12/16, 6/17 i 10/21), upućen od strane poslanika Jasmina Duvnjaka, radi davanja mišljenja povodom upućenog prijedloga. U tom smislu Ministarstvo unutrašnjih poslova Zeničko-dobojskog kantona daje sljedeće:

MIŠLJENJE

Podneseni Prijedlog Programa rada Skupštine Zeničko-dobojskog kantona za 2022. godinu podrazumijeva da se od strane ovog Ministarstva u narednoj godini izvrše izmjene i dopune Zakona o javnom redu i miru-Prečišćen tekst ("Službene novine Zeničko-dobojskog kantona", broj: 12/16, 6/17 i 10/21), s ciljem unapređenja postojećih zakonskih rješenja kroz preciznije i kvalitetnije definisanje svih oblika i mogućnosti zloupotreba društvenih mreža (od govora mržnje, do prijetnji i sl.), te adekvatno prekršajno sankcionisanje svih lica koja na ovaj način ugrožavaju javni red i mir i sigurnost građana

Ministarstvo unutrašnjih poslova Zeničko – dobojskog kantona, ne podržava podneseni prijedlog iz sljedećih razloga:

U Zeničko-dobojskom kantonu, održavanje javnog reda i mira, regulisano je Zakonom o javnom redu i miru-Prečišćen tekst, u kome nisu definisani oblici zloupotreba društvenih mreža i sankcionisanje lica koja na ovakav način ugrožavaju javni red i mir i sigurnost građana. U vezi sa navedenim prijedlogom za izmjene i dopune ovog zakona, koji ima za cilj rješavanje problema najraširenijeg oblika zloupotrebe društvenih mreža, a to je govor mržnje, upućivanje prijetnji i sl., smatramo da navedena problematika zahtijeva sveobuhvatan pristup u iznalaženju adekvatnog zakonskog rješenja kojim bi se postigao cilj i svrha definisanja svih oblika zloupotrebe društvenih mreža. Pri tome se mora uzeti u obzir, da zloupotreba društvenih mreža u smislu raznih oblika nasilja koje se putem njega vrši nad društvenim skupinama i pojedincima, prema svojoj pravnoj prirodi predstavlja povredu javnog poretka, kojim se narušavaju zaštićene vrijednosti društvene zajednice i njenih građana, te navedene radnje u većem broju slučajeva imaju obilježja krivičnog djela.

Swjesni činjenice da je problem zloupotrebe društvenih mreža prisutan i u zemljama sa visokim stepenom demokratije, u kojima takođe nema jasnih i čvrstih rješenja po tom pitanju, te su ista predmet diskusija u smislu da su društvene mreže i internet platforme, pravo svakog pojedinca putem kojih legitimno ostvaruju svoje pravo na slobodu govora i slobodu izražavanja građana, u kom smjeru se postavlja pitanje kako sancionisati ova djela, bez zadiranja u navedene slobode.

S tim u vezi, podneseni prijedlog, odbijamo iz praktičnih razloga, koji se pored naprijed navedenog, odnosi i na teškoće prilikom utvrđivanja identiteta lica koja na ovakav način zloupotrebljavaju društvene mreže. Naime, za utvrđivanje identiteta osobe koja koristi društvene mreže, bilo bi potrebno obratiti se, putem međunarodne pravne pomoći, vlasnicima društvenih mreža (facebook, instagram, twitter i sl.), koji imaju rigorozne kriterije i čine gotovo nemogućim dobijanje podataka o korisnicima društvenih mreža.

Kako se ne bi doveli u situaciju, da se određene inkriminisane radnje propišu kao prekršaj, a da istovremeno nisu osigurane mogućnosti utvrđivanja identiteta počinioca istih, smatramo da trenutno ne postoje adekvatni uslovi za normiranje zloupotrebe društvenih mreža na ovaj način.

Ujedno napominjemo da je na nivou Federacije Bosne i Hercegovine, po sličnoj inicijativi pokrenuta rasprava radi iznalaženja rješenja primjenjivih u praksi u cilju sprečavanja zloupotreba društvenih mreža i nasilja na istima, koja bi se primjenjivala na nivou svih kantona u Federaciji, u kom smjeru se i dalje nastavljaju aktivnosti ovog Ministarstva za iznalaženje mogućnosti za donošenje izmjena i dopuna Zakona o javnom redu i miru u skorijoj budućnosti. S tim u vezi, radi razmatranja zakonskih rješenja u našem okruženju, od strane ovog Ministarstva upućen je upit Ministarstvu unutrašnjih poslova Republike Srpske, da li su na području ovog entiteta usvojene izmjene i dopune Zakona o javnom redu i miru, na način da su društvene mreže, internet stranice i druge internet platforme proglašene javnim mjestom i ukoliko jesu, da li postoje i u čemu se ogledaju eventualne poteškoće u primjeni ovakvih zakonskih rješenja u praksi, kako bi iste prevazišli i kako bismo navedenu oblast učinkovito zakonski regulisali u narednom periodu.

S poštovanjem!

Dostavljeno: 2x Naslovu,
1x a/a

MINISTAR

Dario Pekić